

“HUDUDIY ELEKTR TARMOQLARI” AJ BOSHQARUV RAISING IQTISOD VA MOLIYA MASALALARI BO‘YICHA O‘RINBOSARINING JAMIYAT TIZIMI XODIMLARI, SOHA MUTAXASSISLARI HAMDA AHOLIGA MUROJAATI

Davlatimiz rahbari o‘z chiqishlarida “Jamiyatimizda korrupsiya, turli jinoyatlarni sodir etish va boshqa huquqbuzarlik holatlariga qarshi kurashish, ularga yo‘l qo‘ymaslik, jinoyatga jazo, albatta, muqarrar ekani to‘g‘risidagi qonun talablarini amalda ta‘minlash bo‘yicha qat‘iy choralar ko‘rishimiz zarur”, deya ko‘p bor ta‘kidlab o‘tadi. Shu ma‘noda, jamiyatda korrupsiyaga nisbatan murosasiz munosabatni shakllantirish, davlat va jamiyat hayotining barcha sohalarida korrupsiyaning oldini olishga doir chora-tadbirlarni amalga oshirish, korrupsiyaga oid huquqbuzarliklarni o‘z vaqtida aniqlash, ularga chek qo‘yish, ularning oqibatlarini, unga imkon beruvchi sabablar va shart-sharoitlarni bartaraf etish, korrupsiyaga oid huquqbuzarliklarni sodir etganlik uchun javobgarlik muqarrarligini ta‘minlash yo‘lida davlat va jamoatchilik birlashmog‘i, hamjihatlikda harakat qilmog‘i lozim. Umuman olganda, korrupsiyaviy yo‘nalishdagi huquqbuzarliklarga qarshi kurashish umummilliy vazifa bo‘lmog‘i lozim, deb hisoblayman.

O‘zbekiston Respublikasining “Korrupsiyaga qarshi kurashish to‘g‘risida”gi Qonuni esa bu borada dasturilamal vazifasini o‘taydi.

Bugungi kunda “Hududiy elektr tarmoqlari” AJ tomonidan barcha tarkibiy korxonalarda “Korrupsiyaga qarshi kurashish va komplayens nazorat xizmati” faoliyati yo‘lga qo‘yilgan bo‘lib, bu, o‘z navbatida, korrupsiyaga qarshi ichkaridan turib kurashish, salbiy oqibatlarga olib keluvchi korrupsion holatlarning oldini olishga xizmat qilishini ta‘kidlab o‘tish joiz.

Faoliyat yo‘nalishidan kelib chiqadigan bo‘lsak, o‘tgan qisqa davr mobaynida Jamiyat va uning tarkibiy filiallarida korrupsiyaga qarshi kurashish bo‘yicha 16 dan ortiq ichki idoraviy hujjat ishlab chiqilib, bugungi kunda amaliyotda keng qo‘llanilmoqda. Misol o‘rnida, 2021 yil 10 noyabrdan mavjud barcha bo‘sh (vakant) lavozimlarga malakali mutaxassislarni ochiq tanlov asosida ishga qabul qilish amaliyoti joriy etilgani, Jamiyatning rasmiy www.het.uz saytida tizimdagi korrupsion holatlarning mavjudligi, ularning ko‘rinishlariga baho berish hamda aholi fikrini o‘rganish maqsadida doimiy ishlovchi anonim so‘rovnoma o‘tkazish sahifasi joylashtirilganini keltirib o‘tish mumkin.

Shu bilan birga, “Hududiy elektr tarmoqlari” AJda 2021 yilda ISO 37001:2016 “Korrupsiyaga qarshi boshqaruv tizimi” va ISO 9001:2015 “Sifat menejmenti tizimi” standartlari joriy qilinib, 26 nafar rahbar va ishchi-xodim ISO 37001:2016 standarti bo‘yicha maxsus sertifikatlariga ega bo‘lgani jamiyatimizda korrupsiyaga qarshi kurashishda tizimli say-harakatlar olib borilayotganidan dalolat bermoqda.

Bundan tashqari, Jamiyat va tizim korxonalarida elektr energiyasini sotish, elektr energiyasi yo‘qotishlarini kamaytirish bo‘yicha ishlarni tashkil etish va rejalar o‘z vaqtida bajarilishini nazorat qilish. tizim korxonalarida elektr energiyasi ishlab chiqarish va iste‘mol qilish balanslarini shakllantirish ishlarini tashkil etish,

elektr energiyani uzatish va sotish bo'yicha xo'jalik aloqalariga bozor tamoyillari va mexanizmlarini joriy etishni rivojlantirish. taqsimlovchi va past kuchlanishdagi elektr tarmoqlari orqali elektr energiyasini uzatishda texnologik yo'qotishlarni (isroflarini) kamaytirish chora-tadbirlarini amalga oshirish, qonunchilikda belgilangan tartibda aksiyalar va boshqa qimmatli qog'ozlarni almashtirish, sotib olish va sotish bo'yicha bitimlarni amalga oshirish, moliyalashtirish barcha manbalari hisobiga maqsadli va ratsional ishlatilishini nazorat qilish hamda Jamiyat korxonalarini bilan pudratchi tashkilotlar o'rtasida qurilish-montaj va loyiha ishlari shartnomalarni o'z vaqtida tuzilishini nazorat qilish kabi yo'nalishlarni korrupsiyadan xoli qilish bo'yicha samarali ishlar olib borilmoqda.

Fursatdan foydalanib, Jamiyatning barcha xodimlarini hamda kelajagimizga befarq bo'lmagan fuqarolarimizni qonuniylik, fuqarolar huquqlari, erkinliklari va qonuniy manfaatlarining ustuvorligi, ochiqlik va shaffoflik, tizimlilik, davlat va fuqarolik jamiyatining hamkorligi, korrupsiyaning oldini olishga doir chora-tadbirlar ustuvorligi va har qanday noqonuniy hatti-xarakatlarga nisbatan javobgarlikning muqarrarligi tamoyillariga tayangan holda, korrupsiyaga nisbatan murosasiz munosabatni shakllantirilishi jarayonlarida faol ishtirok etishga chaqirib qolaman.

Eslatib o'tmoqchiman, tizimdagi qonunbuzarlik va korrupsiya holatlariga duch kelsangiz, Jamiyatning 1154 raqamli "Ishonch telefoni" yoki "Korrupsiyaga qarshi kurashish va komplayens-nazorat xizmati"ning (78) 150-75-61 telefon raqami orqali murojaat qilishingiz mumkin. Har bir murojaat qonunda belgilangan tartibda shaxsiy nazoratim ostida ko'rib chiqiladi.

Asrorjon ASQAROV,
"Hududiy elektr tarmoqlari" AJ boshqaruv raisining o'rinbosari.